



Il project Reuniun dallas scolas Ilanz/Glion ei ius a fin culla canzun communabla «Zemba – ensemen».

FOTOS A. BEELI

Mirar sur cunfins e curtgins

Las scolas dad Ilanz/Glion ein sefatschentadas cun cultura e culturas

DAD AUGUSTIN BEELI / ANR

■ **En connex cullas festivadas pil giubileum da 500 onns Reformaziun han las scolas dad Ilanz/Glion realisau in agen project. Suenter liungas preparativas ei vendergis stau il punct culminont.** 500 scolars e scolarsets dalla vichnaunca han festivau 500 onns. Els han buca giu grondas marveglias da quei ch'ei schabegiau igl onn 1519 culla separaziun dallas confessiuns. Lur plascher eis ei stau da passentar in gi special cun in'activitad speciala. Il meinaproject *Marc Pfister* e la squadra preparativa havevan instradau gia baul quei project. La scola ha nezegiau la caschun da sefatschentar cull'atgna identitad, e quei include era la diversitad etnica e culturala.

Per la capientscha vicendeivla

La scola dad Ilanz/Glion san ins presentiar cuortamein aschia: 500 scolars, 80 personas d'instrucziun en sis loghens (Glion, Duin, Rueun, Ruschein, Castrisch e Sevgein), gliued da 22 nazions. Tier la tematica «Reuniun» eis ei stau la finamira da semischedar e mirar viaden ella DNA d'in tal menaschi. Vendergis ein ils commembers d'in menaschi cun «partiziuns» separadas semischedai, cun

loghens da scola, gronds e pigns, jasters e dumias, Romontschs e Tudestgs, etnias e culturas. La gruppa da lavur ed il team da scola havevan elaborau, ensemen cun geniturs interessai, in program variont pigl entir gi. Il program ha vuliu avischinar e svegliar capientscha vicendeivla. Affons da Glion han giu dad ir a Ruschein, affons da Duin a Rueun, affons da Sevgein a Glion cav. La gronda mischeida ha vuliu promover bunas sentupadas e contacts. Ellas fracziuns seigien ils affons lu era veramein semischedai ed ins hagi constatau igl effect giavischau, han ins udiu il vendergis da tuts participants, carschi ed affons. Els affons havevan saviu s'annunziar pils divers luvratoris. Tematicas dallas 22 nazions e culturas ein semischedadas cullas culturas sur-silvanas da 12 vitgs ed in marcauet. Jester e dumiest ei s'occupai per in gi cul medem. A Duin han ins fatg caschiel e jogurt, a Ruschein baghegiu da cuminonza ina casetta cun slondas e fatg paun, a Castrisch ein ils affons girai tras il vitg cun *Hans Caprez*, a Sevgein han els cantau canzuns hollandesas, dus luvratoris ein stai a Rueun.

Vendergis dalla damaun tochen il tard suentermiezgi ein tuts stai occupai els sis loghens ed en gruppas multifaras. Pigl act final dil project e fiasta «Reuniun» ein

tuts serimnai allas 17.30 a Glion. L'unitad ella diversitad ei semanifestada sil plaz da sport dalla casa da scola. Leu han ins saviu visitar l'exposiziun «finiastra dil mund» che geniturs ed affons havevan preparau.

Naziuns e culturas, cun lungatg, usits e cuschina, ein sepresentai. Ins ha saviu degustar tratgas d'ina famiglia curda, dultschs portughes, emperder d'enconuscher l'Ungaria, la Tschechia ed igl Afghanistan. En lur plaids finals han Marc Pfister ed il meinascola *Silvio Dietrich* accentuau ch'ins hagi vuliu ir sur las seivs, ins stoppi saver che sentupadas denter carstgauns augmentien la qualitat da viver. Cuort avon ha ei dau ina presentaziun dallas 20 nazions. Sco finiziun dil project Reuniun dallas scolas Ilanz/Glion han tuts 500 affons cantau da cuminonza la canzun «Zemba – ensemen». *Thomas è Cathomen* ha fatg quella aposta pil gi da project. Il text plaيدا per sesez: «*I kann lach / abmach. I kann sorga / versorga. I kann störe / derzueghöre. Doch zemma, zemma, zemma, zemma kömmer meh. Jeu sai cuorer, discuorer / Jeu sai leger, ereger. Jeu sai viver / esser libers. Ensemen eis ei denton bia pli bi.*» Igl ei stau sorprendent d'udir a cantar ina canzun ch'ei ida – aschia ha ei pariu – ell'ureglia als 500 affons.



Era l'Ungaria ei sepresentada galantamein.



Era els frequentan la scola ad Ilanz/Glion, affons dalla Tschechia e Slovachia.



Els han purtau sin tribuna la bandiera da lur tiara, il Cosovo.



La delegaziun dall'Eritrea sin tribuna.



La famiglia curda ha offeriu als visitaders denter auter «capuns» empleni cun ris picant.



Vesta viaden ella massa da 500 affons, escortai da geniturs e personal da scola.